




ԿԱՐԵՆ ՄԱԹԵՎՈՍՅԱՆ

ՀՈՌՈՄՈՍԻ ՎԱՆՔԻ ՊԱՏՄՈՒԹՅԱՆ ՆՈՐ ԷԶԵՐ (ԺԴ—ԺԹ դդ.)

Անիի մերձակա Հոռոմոսի վանքը միջնադարյան Հայաստանի ամենամշանավոր հոգևոր ու մշակութային կենտրոններից է: Հիմնադրվել է Ժ դարի 30—40-ական թվականներին Բյուզանդիայից (Հոռոմների երկրից) հայրենիք վերադարձած հայ հոգևորականների կողմից (այստեղից էլ՝ Հոռոմոս անունը): Առաջին վանահայրն էր Հովհաննես վարդապետը¹:

Հոռոմոսի դերը մեծապես աճեց 961 թվականից հետո, երբ Աշոտ Գ Ողորմած (953—977) թագավորը Անին հռչակեց Բագրատունյաց պետության մայրաքաղաք, իսկ Հոռոմոսի վանքը դարձրեց թագավորական տոհմի հանգստարան (դամբարանատեղի): Այս ձեռներեց քաղաքական գործիչը, որը երկրի ամրապնդման ուղղությամբ քիչ ջանք չգործադրեց, մահից հետո հողին հանձնվեց Հոռոմոսուն, ուր մինչև մեր դարի սկզբները, պահպանվում էր նրա տապանաքարը: ԺԱ դարի սկզբներին, Սարգիս Ա Սևանցի (992—1019) կաթողիկոսի աթոռակալության տարիներին, մայրաքաղաք Անի տեղափոխվեց նաև Հայոց կաթողիկոսարանը: Ուշագրավ է, որ մահից հետո, 1022 թ., քարեհամբավ Սարգիս կաթողիկոսը նույնպես Հոռոմոսում է թաղվել²:

Վանական համալիրը, որը սկզբնապես քաղկացած էր Ս. Շողակաթ եկեղեցուց, միաբանների կացարանից ու հյուրատնից³, հետագայում, հատկապես ԺԱ դարի առաջին կեսին, զգալիորեն ընդարձակվեց, կառուցապատվեց նոր, թագավորաշեն եկեղեցիներով, մատուռներով, նշխարատնե-

¹ Ստեփանոս Տարոնեցի Ասողիկ, Պատմութիւն տիեզերական, Ս. Պետերբուրգ, 1885, էջ 174:

² Արխատակիսի Լատիվեցույ Պատմութիւն, Երևան, 1963, էջ 26:

³ Ստեփանոս Տարոնեցի Ասողիկ, Պատմութիւն..., էջ 176, 188:

րով ու այլ շինություններով: Գագիկ Ա. Բագրատունին (990—1020) կառուցեց Ս. Գևորգ եկեղեցին, նրա որդի Հովհաննես Սմբատը՝ (1020—1041) Ս. Հովհաննես եկեղեցին: Բագրատունյաց անկումից, ապա 1064 թ. սելջուկների ավերիչ ներխուժումից հետո, Անիի մասն Հոռոմոսի վանքը ևս ծանր վիճակում էր գտնվում: Սակայն ԺԲ դարի վերջերից սկսած, և հատկապես հաջորդ հարյուրամյակի առաջին տասնամյակներին, Զաքարյանների շրջանում վանքը կրկին հոգևոր ու մշակութային առաջատար կենտրոնի դեր է ստանձնում: Այստեղ գործում էր վանական դպրոց, գրչատուն, հարուստ գրապահոց: Վանքի այս շրջանի տնտեսական գործության մասին են վկայում նվիրատվական բնույթի վիմագիր արձանագրությունները:

Ծիշտ է, ԺԳ դարում վանքի ծաղկումն ընդմիջարկվեց մոնղոլական ասպատակություններով, սակայն Հոռոմոսի բարգավաճումը կանգ չառավ: 1229—1253 թվականներին հիշատակվող վանահոր՝ Ամիր Երկաթի որդի Բարսեղ արքեպիսկոպոսի ջանքերով (որը որոշ ժամանակ դարձավ նաև Անիի ու Ծիրակի արքեպիսկոպոսը) Հոռոմոսում նշանակալից շինարարական աշխատանքներ կատարվեցին, վանքը բազմաթիվ նվիրատվություններ ստացավ: Աղբյուրագիտական նյութերից դատելով, մինչև ԺԴ դարի 40-ական թվականները կացությունը Հոռոմոսում հիմնականում կայուն էր: Դրանից հետո, ըստ տարածված կարծիքի, վանքը լքվել է և, շուրջ 300 տարի ամալի մնալուց հետո, ԺԷ դարի վերջերին կրկին վերականգնվել: Մեր որոնումները, սակայն, երևան բերեցին մի շարք ուշագրավ տեղեկություններ, որոնք թույլ են տալիս հիմնավորապես վերանայել այդ կարծիքը:

Հոռոմոսի վանքի պատմության և ճարտարապետական հուշարձանների ուսումնասիրությամբ զբաղվել են Ն. Սարգսյանը, Ա. Մխիթարյանը, Ղ. Ալիշանը, Թ. Թորամանյանը, Ժ. Մ. Թիերին և ուրիշներ⁴: Առաջին երկուսը, որ Հոռոմոս են այցելել 1850-ական թվականներին, նկարագրել են եկեղեցիներն ու մյուս կառույցները, արտագրել ու հրատարակել են տեղի բազմաթիվ վիմագիր արձանագրությունները: Թ. Թորամանյանն անդրադարձել է ճարտարապետական խնդիրներին, պարզել համալիրի հնագույն կառույցի հարցը: Ժ. Մ. Թիերին Հոռոմոս է այցելել արդեն մեր օրերում (1959, 1964, 1970 թթ.) և, տեղում ուսումնասիրելով հուշարձանները, ի մի է բերել նաև վանքի պատմության մասին եղած նյութերն ու հրապարակել առանձին գրքով: Հոռոմոսին անդրադարձել են նաև շատ այլ ուսումնասիրողներ՝ հիմնականում ճարտարապետական հարցերի առնչությամբ:

Մեր նպատակն է լուսարանել վանքի պատմության մի շրջանը, որը դուրս է մնացել նախորդ հետազոտողների ուշադրությունից: Բանն այն է, որ Հոռոմոսի՝ Անիի հետ սերտորեն կապված լինելը (իսկ դա իրոք այդպես էր, քաղաքի արվարձանները հասնում էին մինչև վանք), ինչպես և ԺԴ դարի սկզբներից վիմագիր արձանագրությունների խիստ նվազումը, ուսումնասի-

⁴ Ն. Սարգսյան, Տեղագրությամբ ի Փոքր և ի Մեծ Հայս, Վենետիկ, 1864, էջ 145—168: Ա. Մխիթարյան, Պատմությամբ Հոռոմոսին վանաց ի Ծիրակ, Վաղարշապատ, 1870, 53 էջ, Ղ. Ալիշան, Ծիրակ, Վենետիկ, 1881, էջ 18—32, Թ. Թորամանյան, նյութեր հայկական ճարտարապետության պատմության, աշխատությունների ժողովածու, Երևան, 1942, էջ 298—304, J—M Thierry, Le couvent Arménien d'Horomos, Louvain—Paris, 1980: Հոռոմոսի՝ մշակութային կյանքի մասին մի քանի հրդավածներ են հրատարակվել մեր կողմից՝ Գրիչ և մանրակարիչ Իզմատիոս Հոռոմոսցի, Բանքեր Երևանի համալսարանի, 1982, № 1, Հոռոմոսի գրչության կենտրոնի պատմությունից, «Էջմիածին», 1984, Ե, Կազմարարությունը Հոռոմոսի գրչության կենտրոնում, ՀՍՍՀ ԳԱ Լրաբեր, 1986, № 12:

րողներին ենթադրել են տվել, որ անեցիների արտագաղթով և քաղաքի ամայացմամբ Հոռոմոսը նույնպես՝ առնվազն նույն դարի կեսերին լքվել է։ Ա. Մխիթարյանցը վանքի միջնադարյան վերջին վանահայր է համարում 1326 թ. մի արձանագրության մեջ հիշվող Վահանին⁵։ Պատմաբան Լեոն տեղում արձանագրություններին ծանոթանալուց հետո գրում է. «Հոռոմոսի կյանքը ներկայացնող արձանագրությունները ընդհատվում են 1336 թվականին... այնուհետև սև անհայտություն է գալիս հռչակավոր վանքի վրա, որ շատ հասկանալի կլինի, եթե չմոռանանք, որ շրջականերն էլ քարուքանդ, ավերակ երկիր էին դարձել։ Երեք հարյուր հիսուն տարուց հետո մի արձանագրություն է երևում, որ կարող է այդ երկար ժամանակամիջոցի պատմությունը համարվել»⁶։ Իր կարծիքի ձևակերպման մեջ Թ. Թորամանյանն ավելի հեռաւտես է. «1336 թվականին հետո 349 տարի վանքին վիճակը անստույգ է, եթե բոլորովին ամայացած չէր, գոնե անտերունչ վիճակի մատնված էր մինչև 1685 թվականը, երբ Դանիել վարդապետ նորոգեւր և վերստին շենցուցեւր է»⁷։ Համապատասխան վիճագրերի բացակայության պատճառով, նշված երեք ու կես դարը վանքի պատմության մեջ անհայտության ժամանակաշրջան է համարում նաև Ժ. Մ. Թիերին⁸։

Ինչպիսի՞ն էր Հոռոմոսի վիճակը ԺԴ դարում։ Նախ նկատենք, որ այս շրջանի Անիի պատմությունը, ձեռագրերի հիշատակարանների ընձեռած տվյալների շնորհիվ արդեն միանշանակ կերպով չի բնութագրվում որպես անկման ու ամայացման հարյուրամյակ։ Քաղաքում հարատևում էր մշակութային կայնքը և եթե այնտեղ նոր եկեղեցիներ չէին կառուցվում, ապա գրվում ու նորոգվում էին ձեռագիր մատյաններ։ Այդպիսիներից մեկի ստեղծման ժամանակը 1379 թվականն է⁹։ Իսկ Անիի եպիսկոպոս Հովհաննես Ոսկեփորիկը քաղաքում ձեռագիր է ընդօրինակել անգամ ԺԵ դարի սկզբներին¹⁰։

Հոգևոր ու մշակութային կյանքը շարունակվում էր նաև Հոռոմոսում։ Վերը հիշատակված՝ 1336 թ. արձանագրությունը հավաստում է վանքի կարգավորվող տնտեսական վիճակի մասին (Զաքարե ամիրսպասալարի որդի Ծահնշահ Ա-ի թոռ Վահրամ արթաբեկը վերստին վավերացրել է իր նախնիների կողմից վանքին տրված նվիրատվությունները և ավելացրել նորերը)։ Արձանագրության վերջում հիշվում է Հոռոմոսի վանահայր Ստեփանոսը։ Հոռոմոսում ԺԴ դարից պահպանված այս վերջին արձանագրությամբ, վանքին վերաբերող վիճագիր սկզբնաղբյուրներն իրենց տեղը զիջում են ձեռագրական նյութերին, որոնք և մեծապես հարստացնում, ամբողջացնում են վանքի պատմությունը։

⁵ Ա. Մխիթարյանց, նշվ. աշխ., էջ 21։

⁶ Լեո, Անի, Երևան, 1963, էջ 122 (այս և հաջորդ մեջբերումներում կատարված ընդգծումները մերն են՝ Կ. Մ.)։

⁷ Թ. Թորամանյան, նշվ. աշխ., էջ 302։

⁸ J.—M Thierry, նշվ. աշխ., էջ 5։

⁹ Կ. Մաթևոսյան, XIV դարի հիշատակարանները Անի քաղաքի և անեցիների մասին, Պատմա-բանասիրական հանդես, 1985, № 3, էջ 114։

¹⁰ Կ. Մաթևոսյան, Անիի եպիսկոպոս Հովհաննես Ոսկեփորիկ գրիչը, «Էջմիածին», 1985, Ը, էջ 41—43։ ԺԴ—ԺԵ դդ. Անիում հատվել են մոնղոլական տերության դրամներ։ Արժանահիշատակ է, որ այդ դրամների մեջ կան այնպիսիները, որոնց վրա պատկերված է խաչ և արաբերեն գրված է՝ «Յանուն Հօր և Որդու և Հոգույն Սրբոյ՝ Աստծոյ միակ» բանաձևը։ Տես՝ Խ. Մուշեղյան, Անի և Դվին քաղաքներում գտնված դրամները, Արևելյան աղբյուրագիտություն 1, Երևան, 1988, էջ 82։

1347 թ. ունի Զաքն ու իր որդի Ամիր Սմբատը արձաթե դրվագագարդ կազմ են պատրաստել տալիս և դրանով կազմելով 1325 թ. Զենովայում գրված մի Ավետարան՝ այն նվիրում են Հոռոմոսի վանքին: Ոսկերիչ Գրիգորի պատրաստած կազմի երկու կողմերում էլ դրվագագիր արձանագրություններ են պահպանվել, ուր բացի նշված անձանցից հիշվում են նաև Հոռոմոսի վանահայր Ստեփանոսը, Սարգիս կրոնավորը և ուրիշներ¹¹: Այս արձաթյա կազմին հանգամանորեն անդրադարձած Տ. Իզմայլովան գտնում է, որ այն պատրաստվել է «Հոռոմոսի վանքի շրջանում», միաժամանակ բարձր գնահատելով նրա պատրաստման եղանակը և ինքնատիպ ոճը¹²:

Այսպիսով 1336 թ. արձանագրությունը և 1347 թ. թանկագին կազմով ձեռագրի՝ վանքին նվիրաբերման փաստը, ինչպես և այս շրջանի Անիի կացության մասին եղած տեղեկությունները թույլ են տալիս ԺԴ դարի կեսերը Հոռոմոսի վանքի գոյության անխոռվ ժամանակաշրջան համարել:

Սակայն դրանից որոշ ժամանակ անց Անին ու շրջակայքը ենթարկվել են նոր փորձությունների: Աղբյուրներում պահպանված կցկտոր տեղեկությունները վկայում են 1357, ապա 1398 թ. ավերածությունների ու կողոպուտի մասին¹³, իսկ 1364-ին Երևանում ապաստանած մի անեցի տեղի Կաթողիկե եկեղեցու պատին մի ողբաձայն արձանագրություն է թողել՝ «Աստուած զԱնու ափրողն ափրէ»¹⁴: Ըստ ամենայնի ԺԵ դարի առաջին տասնամյակներին Անին վերջնականապես դատարկվել է քաղաքային բնակչությունից: Սակայն Հոռոմոսի վանքը շարունակել է գործել: Այդ մասին է վկայում 1459 թ. Այրիվանքում Մատթեոս գրչի գրած և Ստեփանոս նկարչի պատկերագրած ճաշոցը (Մատենադարան, № 6272), որը հավանորեն հենց նույն թվականին է Հոռոմոսի վանքին նվիրել սուսցող Աստվածատուր եպիսկոպոսը: Հիշատակարանում այդ մասին կարդում ենք. «Արդ, ես Աստուածատուր եպիսկոպոս շնորհեցի զսուրբ գիրքս Հոռոմոսի վանից դրանն, Սրբոյ Յովանիսի և Սուրբ Աստուածածնին դրանցն, յիշատակ ինձ և ծնողացն իմոց... և մի իշխեսցե հեռացուցանել ի դրանէ սուրբ ուխտին, գողանալով կամ ծախելով կամ գրաւելով...»¹⁵: Զեռագիրը քառորդ դար Հոռոմոսում է մնացել: Այդ է փաստում նույն մատյանի մեկ այլ հիշատակարան՝ գրված Հոռոմոս այցելած Սարգիս Գ (1484—1515) կաթողիկոսի կողմից 1485 թվականին. «Ես՝ Սարգիս կաթողիկոս և Գրիգոր վարդապետ տեսաք զՏարեգիրքս, որ Աստուածատուր եպիսկոպոսն գրել է տվել և յիշատակ գրել է ի Հոռոմոսի վանքս և անիծաւք փակել, որ ի Սուրբ Յովանիսի դուռն կենա: Մեք այլ կրկին հաստատեցաք զՏարեգիրքս ի Հոռոմոսի վանքս, ի դուռն Սուրբ Յովանիսիս, ի յառաջնորդութիւն վանիցս Գրիգոր եպիսկոպոսի... ի թվ. ԶԼԴ (1485)»¹⁶: Սարգիս Գ կաթողիկոսը Հոռոմոսում է եղել

¹¹ Կազմարարությունը Հոռոմոսի գրչության կենտրոնում, էջ 64—68: Զեռագիրն այժմ պահվում է Սանկտ Պետերբուրգում, Էրմիտաժ՝ 93—834:

¹² Т. Измайлова, Армянская рукопись написанная в Генуе в 1325 г. и ее серебряный оклад 1347 г. «Византийский временник», том XX, с. 258.

¹³ Կ. Մաթևոսյան, XIV դարի հիշատակարաններ..., էջ 109—113:

¹⁴ Կ. Ղաֆադարյան, Երևան, միջնադարյան արձանագրությունները և վիճական արձանագրությունները, Երևան, 1975, էջ 141:

¹⁵ ԺԵ դարի հայերեն ձեռագրերի հիշատակարաններ, մասն Բ, կազմ. Լ. Խաչիկյան, Երևան, 1958, էջ 122:

¹⁶ ԺԵ դարի հայերեն ձեռագրերի հիշատակարաններ, մասն Գ, կազմ. Լ. Խաչիկյան, Երևան, 1967, էջ 70:

իր աթոռակալության երկրորդ տարում (հավանաբար Անի այցելելու ճանապարհին): Վանքի պատմության համար կարևոր փաստ է Գրիգոր Եպիսկոպոսի՝ Հոռոմոսի առաջնորդ լինելու մասին հիշատակությունը:

Ինչպես տեսնում ենք, Հոռոմոսը գործող վանք է եղել ընդհուպ մինչև ԺԵ դարի վերջերը: Սակայն դրանով հիշատակարանների արժեքավոր տեղեկությունները չեն ավարտվում: Պարզվում է, որ Հոռոմոսում ձեռագիր է գրվել մահ 1585 թ.: Դա Ավետարան է, որն այժմ պահվում է Նոր Զուղայի Ամենափրկիչ վանքում (№ 59): Գրիչն ու ստացողն է Հոռոմոսի առաջնորդ Հովհաննես Եպիսկոպոսը, որը ձեռագրի 4ա էջում գրում է. «Նկարեցաւ սուրբ առաքելագործ Աւետարանս ձեռամբ Յոհանէս Եպիսկոպոսի Հոռոմոսի վանաց...»¹⁷: Հիշատակարանում նշում է իր ուսուցչին՝ նույնպես Հովհաննես անունով Եպիսկոպոսին՝ «դարձեալ յիշեցէք հեգայհոգի աշխատասէր եւ իմաստուն իմ վարպետ տէր Յովանէս Եպիսկոպոսս»¹⁸: Հոռոմոսի վանահայրը մեծ ազգատոհմի զավակ է եղել, քանզի հիշատակարանում թվարկելով իր հարազատներին (ծնողներ, եղբայրներ, քույրեր, եղբորորդիներ և այլք)՝ նշում է 34 հոգու անուն: Հիշատակագիրը միաժամանակ պատմում է ժամանակի ծանր կացության մասին, երբ ինքը հալածվելով ստիպված է եղել յոթ տարի ապաստանել Բասենում, որից հետո նոր միայն վերադառնալ: Ձեռագրի 187ր էջում գրասեր հոռոմոսցին ցավով գրում է.

«Ի դառնութեան ժամանակի
Չկայ պատիւ գրոց կարդացողին,
Սէրն ցամաքել էր աշխարհին,
Չկար հետեւող գրոց բանին»:

Թերևս մահ այս էր պատճառը, որ Հովհաննեսն ինքն է Ավետարանի գրչության գործ ձեռնարկել: Ուշագրավ է, որ նրա ազգականների թվում եղել են այլ հոգևորականներ: Եղբոր որդին, կրկին Հովհաննես անունով, վարդապետ էր («աշակերտնեցաւ, վարդապետ եղաւ»), մեկ ուրիշը՝ ասրկավագ («ասրկայվաք Մաթոս»): Թերևս նրանք անմիջական առնչություն են ունեցել իրենց ազգակցի տնօրինած Հոռոմոսի վանքի հետ:

Սակայն անկախ ամեն ինչից, կարևորն այն է, որ Սարգիս կաթողիկոսի հիշատակարանի գրությունից ուղիղ մեկ դար անց՝ 1585-ին, Հովհաննեսը հիշվում է որպես «Եպիսկոպոս Հոռոմոսի վանաց» և ոչ միայն պարզապես հիշվում, այլև հենց ինքն է հնամյա վանքում ձեռագիր ընդօրինակում՝ ասես փորձելով վառ պահել երբեմնի հռչակավոր գրչության կենտրոնի մշակութային ավանդները:

Վանքը գործել է մահ հաջորդ՝ ԺԵ դարի կեսերին: Ըստ Ղ. Ալիշանի «Ի կէս ԺԵ դարու (1653)» մի հիշատակարանում նշվում է Հոռոմոսի առաջնորդ մեկ այլ Հովհաննեսի անուն, որը մահ իրեն հորջորջել է «Եպիսկոպոս վիճակին Անոյ»¹⁹:

¹⁷ Ս. Տեր-Ավետիսյան, ցուցակ հայերեն ձեռագրաց Նոր Զուղայի Ամենափրկիչ վանքի հ. Ա, Վիեննա, 1970, էջ 134: Գրիչը «Նկարեցաւ» բառը, օգտագործում է որպես «գրեցաւ»-ի համարժեք, այսինքն՝ «ստեղծվեց»:

¹⁸ Նույն տեղում:

¹⁹ Ղ. Ալիշան, Ծիրակ, Վենետիկ, 1881, էջ 96: Ցավոք հեղինակն իր օգտագործած սկզբնաղբյուրը նշգրտորեն չի նշում, միայն հայտնում է, որ մի ձեռագրի հիշատակարանից է տեղեկությունը քաղել:

Այսպիսով, վերը քերված վկայությունները գրեթե ամբողջովին լցնում են Հոռոմոսի վանքի պատմության երեք ու կես դարյա կարծեցյալ «անհայտության» շրջանը՝ հաստատելով, որ այդ ամբողջ ժամանակահատվածում վանքը թեև գտնվել է դժվարին պայմաններում, բայց հարատևել է, ունեցել բարձրաստիճան առաջնորդներ, հետևաբար նաև միաբանություն:

Սակայն վանքն այնուամենայնիվ մի կարճ ժամանակահատված լքվել է, հավանաբար հիշված վերջին Հովհաննեսից հետո, 1660—70-ական թվականներին: 20—30 տարվա ամայությունն էլ բավական էր (եթե նաև նկատի ունենանք նախընթաց շրջանի դժվարությունները), որպեսզի 1685 թ. Հոռոմոս եկած և վանքի վերականգնման գործը ձեռնարկած Դանիել վարդապետը ցավով արձանագրեր տեղի վաղուց ի վեր «աւերեալ» լինելը: Դանիել Տիգրանակերտցու թողած արժեքավոր արձանագրության մեջ մասնավորապես ասվում է. «Ի ՌԾԼԴ (1685) թուաբերութեան հայոց նորոգեալ պայծառացաւ թագաւորաշէն մեծաւքանչ Հոռոմոսին վանքս ձեռամբ Դանիել Տիգրանակերտցոյ... զի ունէր ժամանակս ոչ սակաւ աւերեալ, ալբով եւ հողով լցեալ, զոր տեսեալ վերոգրեալ Դանիել վարդապետին, եռաց ի հոգի իւր և էարկ զանձն ի չարչարանս, ի դառն ժամանակիս, յորում ազգս Հայոց յոյժ էին չքաւորեալք, և իշխանութեամբ և ջանիւ լուսաւորեալ մաքրեաց զվանքս Սուրբ Յովհաննիսի ի տղմուտ և ի զազիր մթազգածութենէն վասն յուսոյն որ առ Աստուած»²⁰: Ժամանակներն իրոք դժվարին էին, բայց Դանիել Տիգրանակերտցու ազգօգուտ աշխատանքով նորոգված վանքում կրկին վերահաստատվեց հոգևոր կյանքը, որն այնուհետև առանց ընդհատվելու շարունակվեց շուրջ երկուս ու կես հարյուրամյակ:

Մեր օրերն է հասել ԺԷ դարի ավարտին՝ 1699 թ. Ամիրթեցի Դահմազի կողմից Հոռոմոսի վանքին նվիրաբերված թավշյա ասեղնագործ մի վարագույր (պահվում է Հայաստանի Ազգային պատկերասրահում, Արևելք-255 1010): Բուն վարագույրի վերին մասում ավելացված կարմիր կտորի վրա, երկու տողով ասեղնագործված է հետևյալ հիշատակագրությունը. «Յ(Ի) Ը(ԱՏԱ)Կ Է Վ(Ա)ՐԱԳՈՒՐՍ ՀԱՄԹԵՅԻ ՄՂՏՍԻ ԴԱՀՄԱԶԻՆ Ի Դ(ՈՒ)ՌՆ ՍԲ ՅՈՎԱՆՆ, ԹՎԻՆ ՈԾԽԸ (1699) // Ի ՎԱՆՔՆ ՀՈՌՈՄՈՍԻ Ս(Ր)Բ(Ո)-ՅՆ ՄԿՐՏՁԻ»²¹:

Վարագույրի նորահայտ ընծայագիրը կարևոր լրացում է անում Հոռոմոսի այս շրջանի պատմությանը՝ հավաստելով, որ Դանիել վարդապետի ձեռնարկը սոսկ վերաշինման գործերով չի ավարտվել, և որ նորոգված վանքը դեպի իրեն է ձգել անգամ Հայաստանի հեռավոր վայրերից եկած ուխտավորների:

1714 թ. Կարսում գրված մի հիշատակարանում Երեմիա գրիչը նշում է Հոռոմոսի նոր վանահայր Խաչատուր վարդապետին, որը մի ժամանակ եղել է նաև Կարսի Ս. Աստվածածնի առաջնորդը՝ «... առաջնորդութեան սուրբ վանացն Յովհաննու, որ այժմ ասի Ղոջավանք, Խաչատուր վարդապետի...»²²: Այս հիշատակության մեջ առաջին անգամ վանքի հնավանդ Հոռոմոս անվանը զուգահեռ հանդիպում է Ղոջավանք (այլուր նաև Խոջավանք) օտարա-

²⁰ Ա. Մխիթարյանց, նշվ. աշխ., էջ 42:

²¹ Հրատարակվում է առաջին անգամ: Վարագույրի մասին մեզ տեղեկացրել է պատկերասրահի գիտաշխատող Լ. Եսայանը, որին հայտնում ենք մեր շնորհակալությունը—Կ. Մ.:

²² Մատենադարան, № 4608, էջ 114—115, հմմտ. Վ. Հակոբյան, Կանոնագիրք Հայոց հ. Բ, Երևան, 1971, էջ 365:

հունչ անվանումը, որն առաջացել է Հոռոմոս—Անի ճանապարհին կառուցված զույգ աշտարակավոր կամարի՝ Ղոշերի (թուրքերեն՝ զույգ) անունից²³։ Վանքն այդպես է կոչում մահ Սահակ Էրզրումցին՝ 1705 թվականից առաջ գրած մի չափածո ստեղծագործության մեջ. «Տաղ Ղոշավանից սրբոյն Յոհաննու ասացեալ ի Սահակէն...»։ Ինչպես երևում է վերջին քառատողից, տաղը հենց Հոռոմոսում է գրվել։

Ի հռչակաւոր սուրբ ուխտին
Հոռոմոսի Ղոշավանիցս
Սահակ դպիրս ասօղ բանիս
Շնորհատու Սուրբ Յոհաննէս²⁴։

ԺԸ դարի կեսերին Հոռոմոսում հիշվում են երկու վանահայրեր։ 1751 թ. հատվածաբար պահպանված մի արձանագրության մեջ նշվում է Ավետիք եպիսկոպոսը²⁵, իսկ այլ աղբյուրներում՝ 1751—55 թթ.՝ Եղիա վարդապետ Աշակերտցին²⁶։ Այս շրջանում աստիճանաբար վերականգնվում են վանքի մշակութային ավանդները։ 1782 թ. Ակնագյուղեցի Գրիգոր աբեղան Հոռոմոսում ընդօրինակում է Առաքել Սյունեցու «Մեկնութիւն սահմանաց Դարթի» գործը (Երուսաղեմ, № 2023)²⁷։

Արձանագրություններից մեկի համաձայն, 1788 թ. Հովհաննես Շամբեցի վարդապետը նորոգել է Ս. Հովհաննես եկեղեցու զանգակատունը, վանքի պարիսպը և այլն²⁸։ 1784 թ. գրիչ Մանուելը Կարսում ընդօրինակած Վարդան Արևելցու «Աշխարհացույցի» բնագրում հետևյալ հավելումն է արել. «... Զորոյ գետն յԱնու, որ ասեն Արփաչայի, անդ է Ղոշավանքն Սուրբ Յովանէս և Սուրբ Գէորգ զարմանաշէն և հռչակաւոր աթոռ և կան բազում եկեղեցիք, Խ(40) խորան է, Խ(40) պատարագ կու լինի ատուրն»²⁹։ Ինչ խոսք, մեկ օրում մատուցվող 40 պատարագների հիշատակումը Հոռոմոսի մասին եղած ավանդական պատումի մի վերապրուկ պետք է համարել, սակայն կաս-

²³ Կ. Մաթևոսյան, Հոռոմոս—Անի ճանապարհին գտնվող կամարը, Պատմա-բանասիրական հանդես, 1982, № 1, էջ 143—149։ Ղոշավանքի և Թիֆլիսի Փաշա վանքի անունների միջև փորձել է գուգահեռ գտնել Լ. Մելիքսեթ Բեկը, այն կապելով ԺԴ դարի կեսերի Անիի գաղթականության հետ։ Պ. Մուրադյանն այս ենթադրությունը համարում է «տարակուսելի» և ի վերջո իրավացիորեն մերժում (Պ. Мурадян, Армянская эпиграфика Грузии, Тбилиси, Ереван, 1988, с. 50—52)։ Մեր կողմից ավելացնենք, որ Ղոշավանք անունը ԺԴ դարի Անիում ընդհանրապես չէր կարող գոյություն ունենալ։ Հոռոմոսն այս անվամբ հիշվում է դրանից առնվազն երեք ու կես հարյուրամյակ հետո։

²⁴ Լ. Տաշյան, Մայր ցուցակ հայերեն ձեռագրաց մատենադարանին Մխիթարեանց Ի Վիեննա, Վիեննա, 1895, էջ 863։

²⁵ J—M Thierry, նշվ. աշխ., էջ 85։

²⁶ Ս. Էփրիկյան, Բնաշխարհիկ բառարան, հ. Բ, Վենետիկ, 1907, էջ 224—225։

²⁷ Հիշատակարանում գրիչը հայտնում է. «...գրեցաւ... ի գերասբանչ վանքն Հոռոմոսի, որ և ի թագաւորէն Աշոտայ կերտեալ, եւ անուն սրբոյ Կարապետին է կառուցեալ, որ եւ այժմ իսկ անուանի Ղոշավանք, որ եւ անդ բազում աշխատանօք եւ նեղութեամբ ծրեցի ձեռամբ իմով Ակնա գյուղեցի Գրիգոր մեղսալից տառապեալ աբեղայն, ի վայելումն անձին իմոյ»։ Ն. Պողարյան, Մայր ցուցակ ձեռագրաց Սրբոց Յակոբեանց, հ. Է, Երուսաղեմ, 1974, էջ 55։

²⁸ Ա. Մխիթարյանց, նշվ. աշխ., էջ 49։

²⁹ Մատենադարան, № 8100, էջ 254բ, Փ. Փ. Անթափյան, Վարդան Արևելցի, գիրք Ա, Երևան, 1987, էջ 108։

կածից վեր է, որ ԺԸ դարի վերջերին վանքը, ժամանակի պայմանների ներածի չափով, բավական բարվոք կացության մեջ էր: Նման գոյավիճակը շարունակվեց նաև հաջորդ դարում: Ուշագրավ է, որ 1804—07 թթ. ռուս-պարսկական պատերազմի տարիներին, Հոռոմոսում են ապաստանել Էջմիածնի վանքի միաբանները³⁰:

ԺԹ դարում Հոռոմոսի վանքը ենթարկվել է Կոստանդնուպոլսի Հայոց պատրիարքարանին, ընդգրկվել Կարսի թեմի կազմում: Աղբյուրներում հիշվում են Հոռոմոսի վանահայրեր Ստեփանոս եպիսկոպոս Չալախյանը (1825)³¹, Պետրոս վարդապետը (1851)³², նորոգման աշխատանքներ կատարած վանահայր Գրիգորը (1868—71)³³: 1851 թ. վանքում շինարարություն է արել նաև Վարդան վարդապետը³⁴: 1824 թ. վանքի ստացած նվիրատվություններից մեկը՝ եկեղեցական մի ծածկոց, այժմ պահվում է Հայաստանի պատմության թանգարանում (№ 1746): Ընդհանրապես այս շրջանում Անիի ավերակներն այցելած բազմաթիվ ճանապարհորդներ ու գիտնականներ հյուրընկալվել են Հոռոմոսում, քանի որ այն քաղաքին ամենից մոտ գտնվող բնակավայրն էր: Վանքին կից գոյացել էր մի քանի տներից կազմված փոքրիկ գյուղ: 1817 թ. վանքում մի գիշեր օթևանած անգլիացի արվեստագետ Ռոբերտ Կեր Փորտը իր հուշագրության մեջ ջերմորեն է խոսում Հոռոմոսի հյուրընկալ վանականների մասին³⁵: Տեղին է հիշել, որ դրանից շուրջ հազար տարի առաջ Հոռոմոսի վանքը հիմնադրած Հովհաննես վարդապետն ինքը մեծ տեղ է հատկացրել վանական անշահախնդիր հյուրընկալությանը՝ «յորժամ աղքատաց հանդիպեր և անցատրաց և ճանապարհորդաց, հանգստարան պատրաստեր գտեղին՝ մինչև հանգչել իբր յիրեանց տան ամենայն օտարաց»³⁶: Ցավոք նման փառավոր անցյալ, բարի ավանդներ ու երկարաձիգ պատմություն ունեցող Հոռոմոսի վանքն այնուամենայնիվ լքվել է միաբանությունից և ոչ թե «խավար միջնադարում», այլ մեր «լուսավոր դարի» սկզբներին, հայակործան Առաջին աշխարհամարտի տարիներին: Վանքի այս նոր ամայացման վերջին իրեղեն վկաներից է ԺԵ դարի մի ձեռագիր, որն այդ տարիներին դուրս է բերվել Հոռոմոսից և այժմ պահվում է Մատենադարանում (№ 7281):

Այսպիսով, Հոռոմոսի պատմության ԺԴ—ԺԹ դարերին վերաբերող նյութերը ցույց են տալիս, որ Բագրատունյաց Հայաստանի հռչակավոր վանքը, չնայած Անի—Ծիրակի շրջանը պարբերաբար ամայացնող աղետներին, շատ կենսունակ է եղել և փաստորեն առանց երկարատև ընդմիջումների գործել է ողջ միջնադարի ընթացքում: Այն Հայոց երբեմնի շքեղաշեն մայրաքաղաքի հոգևոր ու մշակութային ավանդների պահպանման կարևոր կենտրոններից մեկն էր:

...Այժմ Հոռոմոսի կիսավեր եկեղեցիներն ու թանկագին հիշատակները մնացել են սահմանային դարձած Ախուրյան գետի այն ափին, սակայն դարերի հեռվից իրապես մեզ է հասցեագրված վանքի պատմական ու մշակութային հսկայական ժառանգությունը, որի հետագա ուսումնասիրությունը կարևոր ու այժմեական է:

³⁰ Ա. Մխիթարյան, նշվ. աշխ., էջ 18—19:

³¹ Ա. Էփրիկյան, նշվ. աշխ., էջ 225:

³² Ա. Մխիթարյան, նշվ. աշխ., էջ 53:

³³ Ա. Էփրիկյան, նշվ. աշխ., էջ 224:

³⁴ Նույն տեղում:

³⁵ Հ. Հակոբյան, Ուղեգրություններ, Հ. 2. Երևան, 1934, էջ 748—750:

³⁶ Ստեփանոս Տարոնեցի Ասողիկ, էջ 174: